

موال

صله الأخوه ياعم صله في الوطن والدم مفهاش فصال وكلام
والأخ أصلاً سند في الشده عليه يعتمد ياخدم معاه قدام
لو يوم تهاجمه العدا أوهب له روعي فدا حتي أحرسه لو نام
وأفرح أنا لفرحه وأحزن لأحزانه وأعمل له توبي غطا..
وأقسم معاه لقمتي علشان شريكي ف ذيلتي وف رحله الأرحام..

قوم إصحي قو ياخويا .: يابن أمي وابن أبويا..
دا الفجر جاي ورايا .: قوم إصحي للسحور..
...

يا شایل عني همي .: يا ساكن جوه دمي..
أنا وانت وابن عمي .: ع الباعي والمغرور..
...

أنا وانت كلمه واحدة .: إخوات في عيله واحدة..
أنده لي نده واحده .: أعدي لك البحور..
...

أصل إنت حتة مني .: دايماً في حسن ظني..
في الشدة إنت ملازمي .: وف أصعب الأمور..
...

أخويا ف كل لمحاه .: لو أكلها معاك بملحه
تغمرني أحلي فرحه .: من الأرض لأعلي دور
واصحي للسحور..

زناتي المسحراتي

ووجد الغفور..

...

يا عم حلمي قوم .: إصحي من أحلي نوم..
يدوم عزك يدوم .: أخ وشهم أصيل..

...

أخواتك بتراضيهم .: لا عمرك بتجافيههم..
دائماً تسأل عليهم .: كريم منتاش بخيل..

...

وكتير سألت عنك .: الناس قالولي إنك..
حنين ع اللي منك .: لسائك سلسبيل..

...

جد حتي ف كلامك .: أخ لك إحترامك
الكل حافض مقامك .: من طبعك الجميل

...

بتحافظ ع الاخوة .: سباحنه اللي سوا..
بيدي العزوة قوه .: تفوت في المستحيل..

...

واصحي للكلام..

ووجد العلام..

...

أنا أحب أشوف لخوات شجرة ومفرعه بتطرح حنان علي طول..
وإخوات علي مستوا الحب بينهم دوا طول م الوداد موصول..
والأخ جنب الأخ لو أخوه في يوم قال أخ يفضل عليه مشغول..
لا عدو يدخل ما بينهم ينولوا غاية مرادهم يكونوا ع الدوام عيله..
ولا غيره بينهم ولا خصام ولا مشكلة ولا بينهم طريق مقفول..

أخويا العربي إصحي .: فاتح لك أحلي صفحة..
صفحة أخويه سمحه .: فيها النضال كتير..
...

فارشينها بالحنان .: من سينا للجولان..
إخوات ومن زمان .: الشوق بينا سفير..
...

واصحي يا بو السباع .: في القدس في البقاع..
حنرجع اللي ضاع .: حنحدد المصير..
...

ما دمنا إخوات عزاز .: وقلوبنا من فولاز
لافيه بينا اهتزاز .: في الحب والضمير
...

خطواتنا حتبقي ناجحه .: رمضان بركاته فايحه
ونساييم جايه رايحه .: بتقول الصلح خير
...

واصحي للمصير ..

زناتي المسحراتي

ووجد البصير..

...

يا اخوات بلدنا إصحوا :. اللي غلطان نسامحو..
واللي زعلان نصالحه :. نردله إعتباره..

...

وكلمه صلح دا فيه :. بتخلي قلوبنا صافيه..
وبتدي أخويا عافيه :. في الشده وإنتصاره..

...

أخوك لو حد جرحو :. تقف معاه في جرحو
فرحان تفرح يفرحو :. مهزوم تاخذ بتاره

...

ازاي أخوك تقاطعه :. في الخير خليك متابعه
حزين تمسح له دمه :. دائماً تقف في جاره..

...

عهد الأخوه غالي :. بقولها وصوتي عالي..
أخويا لو نادي لي :. أروح له لحد داره..

...

أنا شفت يا زمن أخوات الأخ يفرح لو شاف أخوه فرحان..
أنا شفت يا زمن أخوات الأخ يتعب لأخوه لو كان أخوه تعبان..
وإن جار عليه الزمان يفتح له بيته وقلبه ياخده بالأحضان..
لخوات كما فروع في شجره شركا في أصل واحد لو هبت عليهم ريح..
يميلوا سوا في الهوا وكأنهم عيله يواجهو غضب الطبيعة كأنهم بنيان..

واصحي للموال

ووجد ذو الجلال

